

國方志叢書·華中地方·第九一四號

據

清·徐家瀛、舒孔恂等纂修
清同治九年刊本

影印

江 西 省

靖安縣志

(一)

成文出版社有限公司印行

本書承

日本國會圖書館以所藏稿本借攝
謹誌並致謝忱

同治九年重修

靖安縣志

續修靖安縣志序

邑之有志所以徵文獻考政事知民風也靖安縣志始修於道光五年續修於道光二十七年綱舉目張燦然大備越十餘年迭遭粵匪之亂板燬者存同治八年余權為斯邑下車伊始即訪求邑志幾不可得亟思召以重

輯之明年春適奉

大府檄重修江省通志頒發章程令
各州縣續行採訪先繕稿本呈備采
錄余喜私願之克遂也爰集紳耆擇
期開局於城南雙溪書院並各都遴
派紳董廣為搜輯於是取舊志之舛
者正之缺者補之厥後二十餘年其間

人物之挺生事蹟之興革茲兵燹之
後草野忠貞閩閩節烈以及緝團勦
賊始末一一考核精詳彙照省章悉為
增入越數月而稿就余以學殖未深早
歲屢躓於場屋迨一行作吏荒陋漸
慙深懼有負委任今不閱月乃與在事
諸君子獲覲厥成以副

大府之命且俾後之官斯土者覽其
書得以考政事之得失知風俗之異宜
而一邑之文獻柱焉且徵是豈獨余之
深幸也哉斯役也既賴諸君子分曹襄
贊實力蒐羅而挈領提綱斟酌損益
寔虞部舒君若人之力為尤著虞
部為奉邑自菴觀桑梓嗣與余為

年世交深稔其家學淵源適似歸里
門遂延入局總司其事悉心纂校
以繼日不徇人言卒成善本湖戊申
續志成柱觀察而志又成於虞部
之手後先濟美尅固同稱洵盛事也
書成爲綴數語於簡端以誌其顛末
如斯至於山川風土物產人文前序悉

言之不復贅云時

同治九年歲在庚午仲秋月

署靖安縣知縣武林徐家瀛撰



舊序

宏治志序

明訓導 王 晟

靖安在禹貢爲揚州之域春秋屬吳楚之間漢唐置鎮爲保障南唐始改爲縣宋屬隆興府元屬龍興路上應斗宿之度其建置沿革山川風土人材物產之類無不悉焉宏治庚戌監察御史姑蘓唐公命晟重加修輯遂與學生搜索舊聞旁詢故老於舊志訛者正之缺者補之凡邑中疆域城郭山水風物之詳靡宇貢賦戶口寺觀祠廟臺榭之概名賢達士孝子節婦之始終以至仙翁釋子之可紀騷人墨客辭章之可取者罔不具載釐爲四卷唐公適他故呈於郡守東魯閻侯

侯喜曰此正吾所究心者也然書欲傳久不可忽再命晟芟正而屬以序維岳之有志猶國之有史也史載天下之事其體當簡而嚴志記一邑之事其體當詳以盡然而史之所書多本於志之所錄則其所繫亦重矣是修輯者誠可忽耶抑宣宗唐之英主也命詞臣纂次諸州境土風物爲處分語故能成大中之治蕭何漢之賢相也收秦圖籍且知天下阨塞戶口多寡之處故能成佐命之功彼爲天子與相天下者且然况郡邑守令乎則其於統內山川之險易風俗之淳漓貢賦戶口之登耗人物之盛衰奚可不究而知之以爲出治之資也施諸政不出戶庭而得之誠於志有所賴而賢侯之喜

豈徒然哉謹書此以爲國史之禪焉

嘉靖志序

明知縣趙公輔

方以之內星野之墟率皆有以志之而後足以備觀省故存
一部有郡乘在一縣有縣乘卽文獻之大端不容更僕而終
者一披閱之盡章明著也然每病於弗傳非志之失所以志
之者未盡也聞之體欲其贍以備詞欲其約以盡記載欲其
精以覈雖非國史之傳而載筆者之所貴均之爲不可易焉
但煩猥者近贍疎淡者近約過刻者近精似是之跡世相沿
襲吾無取焉予自壬戌秋承乏靖邑始至欲索一觀邑博陳
君吳君以邑志未舉告卽思爲一新之越明年春季少暇與

陳吳二邑博及紳士應銳龔邦劉俊陳定宗舒卷舒光遠熊
時中徐肯堂等建局編造兩閱月而成集予曰備矣卽流峙
生植質化變遷習俗移易之類應舉一以例其餘繼以二君
之覈實櫟括兼舉例引互見巨細條縷之故隨在以致其精
予曰此可以言志矣雖未必傳示久遠然邑之情事則然也
其文獻則然也以備一方之見聞亦可謂云爾已聞靖志創
自正統間以天順年重修又以正德年重修雖經瑪瑙之變
簡編焚燬無遺今撿拾煨燼或亦贍所未贍約所未約不然
亦仍之而已不以多文自炫也爰命鏤刻置諸學宮紀綱邑
治總括地宜採風者於此達觀焉或可裨其萬一矣夫古今

風氣又物類有欲闡之時其湮也告或遂之其弊也若或啟之河馬洛龜志兩儀也三墳五典八索九邱志歷代也事與時會文與事宜靖邑之志距今始成或亦數之適然其亦未雕未鑿之時容有洩造化之秘宣帝王之猷者在爲之相符以有成焉耳予也菲劣且素佩闕文之訓有日矣顧縣乘之弗備或亦治體之有缺庸不自外以俟後之同志者

嘉靖志序

明訓導 吳 鎰

邑侯趙公黃村奉行府檄修輯縣志建局移牒命鎰任事夫志者志五十年之事蹟也世道之升降所關辭弗獲已因集諸紳士應銳龔邦劉俊陳定宗舒卷舒光遠熊時中徐肯堂

輩入局檢閱舊乘搜尋典故博採時事謹書備錄因敢遺謬
山川草木仙釋寺觀壇祠因其舊而已若建置則首修城暨
及黉宮官司則次厯任顯著者登於名宦科貢則記出身賢
俊者表諸鄉賢忠臣孝子義夫節婦皆有所取以勵風教義
民不沒其輸粟之誠者民與其向善之美補輯考訂類聚成
編分爲六卷之綱之紀有條不紊凡此不過使邑之後進得
以循名而責實原始而考終也敢曰定褒貶示勸懲乎哉孟
冬志成獻侯侯又刪其繁亂提綱挈領斟酌損益以成館之
所不及者多也訖而鳩工鐫梓屬館叙於後館曰極知僭踰
無所逃罪况敢附於我公之末也耶二三子固請曰趙侯

我民庶惇尚教化其茲文獻善政之大既任其事曷容以無
言哉是以自忘猥陋續諸公之末以紀其畧深懼責有弗勝
再俟後之君子

康熙癸酉志序

國朝知縣高克藩

班史有八志有列傳後之郡縣志皆其遺意也但當時與國
史合而爲一後世判爲二書大抵史之紀事提挈要領而志
則搜羅纖畧不嫌其詳史之紀人褒誅謹嚴而志則表彰美
善無取乎貶蓋其體制不同如此然而亥豕魯魚傳聞不一
詳者必訂其訛賢否疑似情勢易淆褻者必去其濫是則不
同中其旨又未嘗不合也靖安縣志創自正統重修於宏治

庚戌至嘉靖乙丑邑令趙公黃村輯而新之至於今一百二十餘年矣滄桑變更者舊凋謝遺文湮於榛莽故事沒於樵漁及今不修後此有訪求文獻輯續簡編致嘆於杞宋之無徵者非司牧之羞而誰羞歟况志非細故也分野災祥天文備焉山川疆域地理悉焉創制立法裁成輔相人事昭焉而且官制賦役祭祀營建禮樂兵革無一不具則於志而可見六官之制度焉忠貞慈孝節列友義耆舊德行無一不載則於志而可見五品之行焉其餘鳥獸草木米鹽茶蔬雖小不遺賦頌詩歌箴銘傳贊有美必錄則於志而更可以博物多識焉在上者而不通乎志之義則國無善政在下者而不